



**Mahein Nia Lian No. 22, 18 Agustu 2011**

## **Polísia Militar: Suporta ka Hakat Liu PNTL?**

### **Introdusaun**

Jeralmente Polísia Militar nia knaar mak hanesan halo funsaun Polisiamentu Militar nian hodi garantia implementasaun ba lei, disiplina, no orden iha viziñansa, no mós ba interesse Militar nian ne'ebé mak bele iha forma servisu públiku, apoiu, no mós fortaleimentu ba instituisaun militar iha nasaun ida nia laran. Timor-Leste mós hanesan ho nasaun sira seluk ne'ebé mak iha instituisaun defeza nian ne'ebé bolu naran Falintil-Forças Defesa Timor-Leste (F-FDTL) ne'ebé harii iha tinan 2002.

Instituisaun defeza F-FDTL mós iha ona Unidade Polísia Militar ida ne'ebé estabese iha lora 8 Novembru 2006. Bazeia ba artigu 12.4 Dekretu Lei No 15/2006 8 Novembru, ne'ebé mak Estabese Polísia Militar nu'udár Unidade ida iha FALINTIL – Forças Defesa Timor-Leste nia laran, tuirmai bolu naran F-FDTL.<sup>1</sup>

Lala'ok istória Unidade Polísia Militar (UPM) nian ne'e la sees husi istória luta ba independénsia nian no mós istória Falintil-FDTL nian, kriasaun ba Unidade Polísia Militar nian ne'e nu'udár ideia ne'ebé hamosu husi lideransa Falintil-FDTL nian balun ne'ebé mak nu'udár veteranu atu nune'e bele harii disiplina iha F-FDTL nia laran.

Iha tempu Falintil ne'e harii to'o (transformasaun) ba F-FDTL iha lora 1 Feveiru 2001,<sup>2</sup> seidak iha instrumentu lei ka regulamentu ruma mak kontrola organizasaun armada ka forsa armadas ida. Alende ne'e, sira hirak ne'ebé sai nu'udár membru F-FDTL nian ne'e maioria domina liu husi veteranu rezisténsia nian ne'ebé mak sempre haree liu ba iha eroizmu.

Tan ne'e, iha inísiu husi transformasaun Falintil ba F-FDTL nian, iha membru F-FDTL barak ne'ebé mak pertense ba veteranu envolve iha kazu violasaun ba lei nian. Iha relasaun ba ne'e, fonte Fundasaun Mahein (FM) nian hateten katak, dezde estabesimentu F-FDTL nian, iha veteranu ne'ebé nu'udár membru F-FDTL nian envolve iha kazu kontrabandu ba aikameli no mina kombustível. Liután, fonte FM nian esplika katak, hahalok violasaun ba lei nian ne'ebé mak komete husi membru F-FDTL nian nunka hetan prosesu husi PNTL nune'e mós PNTL laiha kapasidade atu aplika lei hasoru membru F-FDTL ne'ebé mak nu'udár soldadu kombatente nian.<sup>3</sup>

Ne'e-duni mosu ideia husi ema balun atu harii instituisaun ida ne'ebé mak bele trata ho disiplina iha organizasaun forsa militar nian, jeralmente sira hirak ne'ebé mak hamosu hanoin ida-ne'e mós nu'udár veteranu.

<sup>1</sup> Artigu 1 iha Estatuta Orgánika Polísia Militar, Dekretu Lei No. 26/2009.

<sup>2</sup> Observasaun ba transformasaun Falintil ba F-FDTL no ninia Implikasaun, Buletin La'õ Hamutuk, Vol. 6, 1-2 Abril 2005.

<sup>3</sup> Entrevista ho fonte A Fundasaun Mahein iha Dili, 30 Juñu 2011

Tuir fonte<sup>4</sup> Fundasaun Mahein (FM) nian esplika katak, dezde lora 1 Febreiru 2001 to'o agora iha membru F-FDTL balun mak indisciplinár. Bainhira membru F-FDTL nian halo asaun indisciplinár ka kontra lei entaun lideransa F-FDTL nian lakohi atu ninia membru sira hetan kapturasaun husi instituisaun polisia nasional, PNTL.

Liután fonte FM nian mós esplika katak, husi tinan 2004 to'o ba 2006 iha membru F-FDTL nian balun mak envolve iha asaun kontra lei hanesan hahalok ne'ebé komete husi Tenente Gastao Salsinha no Kai Keri, membru nain rua ne'e envolve iha asaun kontrabandu ba ai-kameli husi Timor-Leste ba iha Timor Loromonu-Indonézia.<sup>5</sup>

Envolvimentu Tenente Gastão Salsinha nian mós hato'o husi Komandante F-FDTL Taur Matan Ruak ne'ebé dehan katak, Salsinha iha problema ho negósiu ilegal ba ai-kameli. Ida-ne'e Ruak haktuir iha Televizaun Nasionál Timor Leste (TVTL). Liután Taur mós haktuir katak, tanba ninia envolvimentu iha problema ai-kameli nian, ofisiál ida-ne'e nia diviza la hasa'e. Ninia planu estudu ba Portugal mós kansela tiha husi kuartél jerál F-FDTL nian.<sup>6</sup>

Enkuantu tuir komandante Unidade Polisia Militar, Majór Renilde Guterres Corte-Real de Silva hateten katak, estabesimentu ba Unidade Polisia Militar nian ne'ebé direktamente iha xefi estadu maiór F-FDTL nia okos ne'e atu hodi hala'o knaar no hetan orientasaun direta husi xefi estadu maiór forsa defeza F-FDTL nian.<sup>7</sup>

Estabesimentu ba Unidade Polisia Militar iha instituisaun defeza F-FDTL nia laran ne'e ho ninia knaar prinsipál halo-tuir kondisaun sira ne'ebé mak haklaken ona iha Lei Orgánika Polisia Militar nia laran, hanesan iha artigu 2 kona-bá prinsipiu Unidade Polisia Militar nian ne'ebé mak esplika liután iha pontu 2 katak, knaar Polisia Militar nian mak atu evita no kombate ameasa seguransa militar nian, inklui subversaun no ameasa seluk hasoru disiplina militar no integridade F-FDTL nian, no utilizaun ba forsa nian sempre koko atu uza meu negosiasaun no arbitrajen hodi rezolve disputa ka konflitu ho dame, inklui preferénsia atu uza kilat ne'ebé lá'os hamate (naun-letál).<sup>8</sup>

Enkuantu iha artigu 6 kona-bá kompeténsia nian, iha pontu 1 esplika katak, Polisia Militar mak responsável atu garante orden no disiplina interna iha F-FDTL nia laran, mantein regra no regulamentu hotu-hotu iha área jurisdisaun ne'ebé mak tama iha Komandu Territoriál ne'ebé nia horik ba ka ida ne'ebé mak atribui ona, no mós asegura katak parte militar nian sei la halo asaun ne'ebé indisciplinár ka asaun ne'ebé la prestijozu hasoru instituisaun militar.<sup>9</sup>

Ne'e-duni estabesimentu ba instituisaun Unidade Polisia Militar nian la sees husi asaun indisciplinár husi membru sira durante ne'e. Ne'e-duni objetivu prinsipál husi estabesimentu Unidade Polisia Militar nian ne'e mak atu regula regra no norma sira, mantein no fiskaliza disiplina ka orden moris soldadu FALINTIL-FDTL nian, nune'e ninia knaar no devér sira bele hala'o ho di'ak no mós evita ameasa seguransa hasoru militar no proteje integridade F-FDTL nian no harii metin regra hotu-hotu iha organizaun armadu sira nia laran.

---

<sup>4</sup> Entrevista ho fonte A Fundasaun Mahein iha Dili, 30 Juñu 2011.

<sup>5</sup> Entrevista ho fonte A Fundasaun Mahein (FM), iha Dili 30 Juñu 2011

<sup>6</sup> <http://mauberedigitalarmy.wordpress.com/2006/07/18/your-viewpoint-on-my-viewpoint/>

<sup>7</sup> Entrevista ho Komandante Unidade Polisia Militar, Majór Renilde Guterres Corte-Real de Silva iha kuartél Polisia Militar Kintal Bo'ot, Dili 29 Juñu 2011.

<sup>8</sup> Tanba seidak iha Lei Orgániku Polisia Militar nian iha lian tetum ne'e-duni ami tradús ba iha lian tetum no Indonézia hodi nune'e ami husu ita boot sira nia komprensaun se karik iha erru ruma iha ninia tradusaun.

<sup>9</sup> Estatuta Orgánika Polisia Militar, Dekretu Lei No. 26/2009.

## Polísia Militar Hasoru Asaun Indisiplinár ka Krime

Polísia Militar nia knaar ida mak ezekuta implementasaun lei nian, disiplina no orden iha ámbitu Forsas Armadas (F-FDTL) nian. Iha Lei Orgánika Polísia Militar nian, artigu 11 kona-bá Investigasaun ba krime ho natureza militar nian no violasaun ba disiplina nian ne'ebé iha pontu 1 esplika katak, kompeténsia ida husi Polísia Militar nian mak nu'udár investigadór ba krime militar nian nune'e mós violasaun ba disiplina nian ne'ebé mak komete husi ema individuál sira hodi hakru'uk ba lei militar nian.<sup>10</sup>

Klaru katak eventu asaun kriminal sira no mós violasaun disiplinár ne'ebé komete husi membru F-FDTL sira durante hala'o knaar ne'e, tuir loloos Polísia Militar mak halo investigasaun hasoru asaun violasaun disiplina militar ne'ebé akontese. Enkuantu kazu sira ne'ebé asosiadu ho asaun krime ka ofensa kriminal nian ne'ebé komete husi membru individuál sira ka comunidade sivil sira sai nu'udár autoridade polísia nasional, PNTL nian.

Asaun hirak-ne'e bele fahe ba parte rua, primeiru mak hahalok ilísitu sira ne'ebé komete husi membru militar nian sira ne'ebé mak baibain bolu dehan husi grupu militar nian, nu'udár asaun indisiplinár. Enkuantu segundu mak asaun krime ne'ebé mak kategoriza nu'udár krime sivil ka atuasaun kriminal, ne'e pertense ba buat hotu ne'ebé kontra lei ka atuasaun kriminal ne'ebé komete husi comunidade ka membru militar ne'ebé mak folga hela/la hala'o knaar ativu, ida-ne'e sei sai nu'udár kompeténsia polísia nasional nian atu foti medida legál hasoru atór.

Asesor Legál Sekretaria Estadu ba Defeza nian, Tiago A. Sarmiento halo diferença kona-bá membru individuál ne'ebé mak envolve iha krime violasaun ba lei nian hanesan tuirmai: Se bainhira membru militar nian ne'ebé hatais hela farda, halo asaun krime hasoru ema seluk, ida-ne'e rekoñese katak ema ne'e halo asaun nu'udár membru militar F-FDTL nian. Maibé se karik asaun krime ne'e hala'o iha liur ba servisu hodi hatais roupa sivil nian entaun ema ne'e konsidera lá'os nu'udár membru militar ida no klaru katak sei trata hanesan ho sidadaun iha jerál.<sup>11</sup>

Ida-ne'e mós konfirmadu iha Lei Orgánika Polísia Nasionál Timor-Leste (PNTL) nian<sup>12</sup> artigu 2 kona-bá Kompeténsia Polísia Nasionál Timor-Leste ne'ebé mak esplika liután iha pontu 2 alínea B katak, Atu garante orden, seguransa no hakmatek iha comunidade nia leet; enkuantu iha alínea C mós haktuir katak, Atu prevene asaun krime no mós hahalok sira seluk ne'ebé kontra lei no regulamentu sira;<sup>13</sup>

Iha Konstituisaun Repúblika Demokrátika Timor-Leste nia laran mós fó autoridade ba polísia nasional Timor-Leste (PNTL), ne'ebé mak esplika iha Artigu 147 kona-bá Polísia no forsa seguransa, iha pontu 2 haktuir katak, Prevensaun ba krime tenki hala'o duni hodi respeita nafatin direitus umanus.<sup>14</sup>

Ne'e-duni, asaun krime ne'ebé mak ho natureza sivil nian ne'e tuir loloos nu'udár responsabilidade polísia nasional PNTL nian hodi foti medida ne'ebé estrita hasoru atór sira ne'ebé mak envolve iha krime ne'ebé kontra lei.

Maibé maioria husi kazu krime sivil ne'ebé komete husi membru individuál sira militar nian, iha liur ba oras serbisu nian, laiha kapturasaun no mós detensaun husi polísia nasional,

<sup>10</sup> Estatuta Orgánika Polísia Militar, Dekretu Lei No. 26/2009.

<sup>11</sup> Entrevista ho Asesor Legál Sekretaria Estadu Defeza nian, Tiago A. Sarmiento, iha Dili, 24 Jullu 2011.

<sup>12</sup> Tanba seidauk iha Lei Orgániku polísia nasional Timor-Leste (PNTL) nian iha lian tetum ne'e-duni ami tradús ba iha lian tetum no Indonézia hodi nune'e ami husu ita boot sira nia komprensaun se karik iha erru ruma iha ninia tradusaun.

<sup>13</sup> Estatuta Orgánika Polísia Nasionál (PNTL) Dekretu Lei Númeru 9 / 2009.

<sup>14</sup> Konstituisaun Repúblika Demokrátika Timor-Leste, tinan 2002, pájina:42.

PNTL. Atuasaun PNTL nian ne'e hatudu katak polisia sente tauk uitoan bainhira hasoru ho membru F-FDTL nian ne'ebé envolve iha krime kontra lei. Iha parte seluk F-FDTL la hakru'uk ba no depresia prosesu legál ne'ebé dezempeña husi instituisaun PNTL nian iha unidade Investigasaun Krime nian. Situasaun ida-ne'e bele haree iha tinan 2004 iha ne'ebé mak PNTL disitru Baucau nian atu halo kapturasaun ba Gastao Salsinha tanba ninia envolvimentu iha kontrabandu ba ai-kameli, nia reziste hodi hasai kilat no tiru sa'e ba leten nune'e halo PNTL lakon kbiit.

Situasaun hanesan ne'e sei influencia instituisaun PNTL atu foti asaun estrita hasoru membru F-FDTL nian ne'ebé hetan katak halo atuasaun kontra lei. Maski PNTL ho ulun-toos hakarak atu mantein lei, klaru katak membru F-FDTL nian sei la hakru'uk ba PNTL. Situasaun ida-ne'e bele hamosu konfrontasaun entre instituisaun rua ne'e. Hanesan konfrontasaun entre PNTL no FDTL ne'ebé akontese iha tinan 2004 iha Becora, nune'e mós konfrontasaun ne'ebé akontese iha Lospalos iha tinan 2005 liubá.

Lá'os ne'e deit, sei iha kazu violasaun ba lei nian barak ne'ebé komete husi membru F-FDTL nian mak nunka hetan prosesu husi instituisaun PNTL. Kazu persegisaun hasoru feto ida naran Maria Alves ne'ebé mak serbisu iha Restaurante ida iha área Metiaut nian iha tinan 2008 to'o hetan kanek todan.<sup>15</sup> Laiha kapturasaun husi polisia nasional, maibé membru ida-ne'e hetan ona demisaun husi ninia unidade iha tinan 2010 liubá.

Kazu persegisaun husi membru F-FDTL balun hasoru membru komidade iha Laivai to'o ikusmai halo mate ema ida naran Pedro Ricardo no ema nain tolu seluk lori halai ba iha ospital ne'ebé besik ba fatin ne'e.<sup>16</sup> Maibé polisia nasional, PNTL distritu Lautem nian la halo intervensaun ba asaun krime ne'ebé mak membru F-FDTL balun halo ona.

Kazu seluk mak asasiniu ne'ebé komete husi membru F-FDTL nain ida hasoru avó ferik ida naran Lucia Martins iha suco Mascarinhas iha fulan Juñu 2011 liubá. Kazu persegisaun husi membru F-FDTL nian ne'ebé mak halo ferik Lucia mate molok ba to'o iha ospital.

Depoizde persegisaun ne'e hotu tiha, polisia nasional mai kedas iha Fatin Akontesimentu Krime (TKP) nian maibé PNTL la halo detensaun hasoru atór persegisaun nian ne'ebé mak iha verdade nu'udar soldadu F-FDTL nian.<sup>17</sup> Atór krime nian ne'e ikusmai hetan kapturasaun no hetan interrogasaun husi Unidade Polisia Militar.

Maibé Majór Renilde Guterres Corte-Real hateten katak, Unidade Polisia Militar halo xamada ba nia atu mai halo deklarasaun kona-bá problema ne'ebé akontese tanba kazu ne'e lá'os nu'udar krime militar nian. Liután Majór Renilde Guterres Corte-Real dehan, krime militar só akontese deit iha funu laran<sup>18</sup> ne'e-duni asasiniu ne'ebé akontese iha Balide ne'e nu'udar krime sivil, ne'e-duni membru ne'e sei hasai tiha husi militar hafoin sei entrega ba PNTL hodi halo prosesu tuir lei ne'ebé aplika. Liutiha semana balun membru ne'e demitidu duni husi instituisaun militar, F-FDTL.

Nune'e mós bainhira akontese konfliktu entre grupu Seguransa Cruz Joven ho membru individuál Unidade Polisia Militar ida iha Igreja Sao Joao Bosco aldeia Beto, Comoro.<sup>19</sup> Konfliktu ne'e lahetan intervensaun husi PNTL, ne'e-duni mak Unidade Polisia Militar nian halo kapturasaun ba membru Polisia Militar ne'e no mós Seguransa Cruz Joven nian hodi halo interrogasaun.

<sup>15</sup> [http://old.cjitl.org/index.php?option=com\\_content&task=view&id=577&Itemid=99999999](http://old.cjitl.org/index.php?option=com_content&task=view&id=577&Itemid=99999999)

<sup>16</sup> Kazu Laivai, Família Sei Fo Presaun Ba Komando F-FDTL, Jornal Tempo Semanal Edisaun, 02 Setembru 2010.

<sup>17</sup> Pedidu no Lamentasaun husi Ekipa Advokasia Violénsia Bazeia ba Jéneru, Dili, 06 Julu 2011.

<sup>18</sup> Entrevista ho Komandante Unidade Polisia Militar, Majór Renilde Guterres Corte-Real de Silva iha kuartél Polisia Militar Kintal Bo'ot, Dili 29 Juñu 2011.

<sup>19</sup> [www.cjitl.org/.../174-instituisaun-be-kruel-instituisau...](http://www.cjitl.org/.../174-instituisaun-be-kruel-instituisau...) - Timor Leste

Iha relasaun ba ne'e Komandante Unidade Polísia Militar, Majór Renilde Guterres Corte-Real e Silva hateten katak, kazu Beto nian Unidade Polísia Militar la halo kapturasan maibé halo deit xamada hodi halo interrogasan tanba iha envolvimentu husi membru sira Unidade Polísia Militar F-FDTL nian.

Liután Majór Renilde Guterres Corte-Real esplika katak, kazu krime nu'udár kompeténsia PNTL nian atu halo kapturasan no mós halo investigasan ba ema sira ne'ebé mak deskonfia katak envolve iha krime.<sup>20</sup>

Enkuantu tuir Asesor Legál Sekretaria Estadu ba Defeza nian, Tiago A. Sarmiento hateten katak, se karik iha membru F-FDTL nian mak envolve iha krime kontra lei iha situasan ne'ebé mak hala'o hela ninia funsan ativu, Unidade Polísia Militar nian iha kompeténsia atu halo prosesu detensan no intervensan ba kazu ne'e hodi entrega ba autoridade competente hodi prosesa tuir lei ne'ebé mak aplika.<sup>21</sup> Depoizde entrega tiha ba autoridade competente no hetan katak membru individuál ne'e envolve duni iha kazu baku-malu nian, entaun sei hasai nia husi ninia instituisan.

Klaru katak bainhira iha membru individuál ruma mak halo asan krime durante hala'o hela ninia funsan ativu ka hatais farda, Unidade Polísia Militar nian bele halo intervensan hodi halo detensan, maibé se karik asan ne'e mak akontese iha liur ba oras serbisu nian no ema ne'e hatais roupa sivil entaun ida-ne'e nu'udár responsabilidade PNTL nian tanba asan ne'e komete husi ema sivil no tenke prosesa hanesan ho sidadaun sira seluk.

Maibé iha kazu balun hanesan iha leten ne'e, ne'ebé hatudu katak intervensan Unidade Polísia Militar nian barak liu ba iha área kompeténsia polísia nasional nian, ida-ne'e sei hamosu ostilidade entre instituisan rua ne'e iha aban-bainrua. Fundasan Mahein konsidera katak intervensan Unidade Polísia Militar nian ba iha kazu seguranza interna nian ne'e tanba deit atusasan PNTL nian ne'ebé ladún proativu hodi responde ba situasan ne'ebé akontese durante ne'e, ladún profesionál hodi hala'o ninia knaar no la neutru hodi dezempeña ninia funsan nu'udár instituisan seguranza nian.

### **Intervensan Unidade Polisi Militar nian iha Seguranza Interna**

Intervensan Unidade Polísia Militar nian dalabarak akontese tanba laiha konfiansa husi públiku ba PNTL ne'ebé la halo intervensan lalais ba iha kazu sira ne'ebé akontese durante ne'e, no mós kazu violénsia ne'ebé mak akontese, dalabarak envolve membru polísia nasional nian.

Akontesimentu 4 Juñu 2011 sei fresku iha ita nia hanoin bainhira mosu konfrontasan entre joven sira husi Au-Hun ho joven sira husi Bidau Masaur. Konfrontasan ne'e rasik envolve membru polísia nasional, PNTL nain neen husi unidade Task Force,<sup>22</sup> situasan ida-ne'e hatudu katak laiha neutralidade husi polísia nasional, hodi hala'o ninia knaar no funsan ho dí'ak.

Iha relasan ba ne'e, fonte A Fundasan Mahein nian hateten katak, intervensan husi Unidade Polísia Militar nian bele hamosu problema entre F-FDTL no comunidade sira. Tanba F-FDTL ne'e hetan treinamentu atu tiru no oho lá'os atu halo kapturasan..<sup>23</sup> Enkuantu iha Konstituisan RDTL, artigu 146 kona-bá Forsas Armadas nian, iha pontu 2

<sup>20</sup> Entrevista ho Komandante Unidade Polísia Militar, Majór Renilde Guterres Corte-Real e Silva iha kuartel Polísia Militar Kintal Bo'ot, Dili 29 Juñu 2011.

<sup>21</sup> Entrevista ho Asesor Jurídiku, Asesor Legál iha Sekretaria Estadu ba Defeza nian, Tiago A. Sarmiento, iha Dili, 24 Jullu 2011.

<sup>22</sup> Entrevista Fundasan Mahein ho sefi Aldeia Auhu Soltorio Junior Ximenes Nunis, Dili, 08 Juñu 2011.

<sup>23</sup> Entrevista ho fonte A Fundasan Mahein iha Dili, 30 Juñu 2011.

hateten katak, FALINTIL/FDTL garante independénsia nasionál, integridade territoriál no mós liberdade no seguransa povu nian hasoru forma hotu-hotu husi agresaun ka ameasa ne'ebé mai husi liur, hodi respeita nafatin ba orden konstitusionál nian.<sup>24</sup> Ne'e-duni intervensaun Unidade Polísia Militar nian ne'e perigu tebes bainhira hasoru kazu krime ka asaun krime sira ne'ebé mak mosu iha comunidade nia laran.

Enkuantu tuir Observadór ba asuntu defeza no polisiamentu Timor-Leste nian katak, envolvimentu Unidade Polísia Militar nian ne'e akontese tanba públiku laiha konfiansa ba iha instituisaun polísia nasionál, PNTL, tanba ninia membru sira sempre envolve iha konfliktu entre grupu. Liután, Observadór Asuntu defeza no polisiamentu Timor-Leste nian ne'e hateten katak, públiku respeita/valoriza liu instituisaun defeza F-FDTL tanba ninia istória nu'udár forsa libertasaun nian duké PNTL.<sup>25</sup>

Maski nune'e atu ho motivu saida deit, intervensaun Unidade Polísia Militar nian iha kazu kapturasaun ba membru individuál nune'e mós comunidade sivil sira ne'ebé envolve iha kazu violénsia ka asaun krime nian ne'ebé kategoriza nu'udár krime natureza sivil nian ne'e kontra ona lei.

Ne'e-duni Fundasaun Mahein rekomenda ba PNTL atau halo intervensaun lailais ka rezolve problema sira ne'ebé mak mosu iha comunidade nia leet, hasa'e neutralidade husi membru PNTL nian bainhira hala'o hela knaar no evita envolvimentu membru individuál nian iha konfliktu entre grupu.

### **Polísia Militar Iha Seguransa Interna nian**

Iha jerál, funsaun prinsipál polísia nasionál, PNTL nian mak hodi garante seguransa interna no mós orden iha rai-laran. PNTL mak nu'udár instituisaun úniku ne'ebé mak asumi funsaun ne'e, ne'ebé mak nia ezekuta liuhosi kontrolu sosiál. Polísia nasionál, PNTL simu autoridade tomak hodi dezempeña funsaun ne'e, ne'ebé mak la fó ba orgaun/instituisaun seluk.

Iha Konstituisaun Repúblika Demokrátika Timor-Leste nian, Artigu 147 kona-bá Polísia no forsa seguransa,, pontu 1 mós haktuir katak, Polisi defende legalidade demokrátika no garante seguransa interna ba sidadaun hotu-hotu no rigorozamente apartidária.<sup>26</sup>

Enkuantu sistema defeza nasionál nian ne'e nu'udár responsabilidade forsa defeza Timor-Leste nian, tuir ne'ebé mak haklaken iha Konstituisaun Repúblika Demokrátika Timor-Leste, Artigu 146 kona-bá Forsas Armadas, iha pontu 1 haktuir katak, Forsas Armadas Timor-Leste FALINTIL/FDTL, mak nu'udár responsável ba defeza militar Repúblika Demokrátika Timor-Leste nian, eskuzivamente kompostu husi sidadaun nasionál sira no ninia organizesaun ne'e úniku ba territóriu nasionál tomak.

Esplika liután iha pontu 2 artigu ne'e katak, FALINTIL/FDTL garante independénsia nasionál, integridade territoriál no mós liberdade no seguransa povu nian hasoru forma hotu-hotu husi agresaun ka ameasa ne'ebé mai husi liur, hodi respeita nafatin ba orden konstitusionál nian.

Maibé iha Lei Seguransa Nasionál nian<sup>27</sup> Artigu 18 kona-bá Sistema Seguransa Nasionál integradu fó autorizasaun ba instituisaun seluk hanesan Unidade Polísia Militar nian atu

<sup>24</sup> Konstituisaun Repúblika Demokrátika Timor Leste, 2002.

<sup>25</sup> Entrevista ho Gordon Peake Observadór ba Asuntu defeza no polísia Timor-Leste, liuhosi telefone Skype iha Internet iha Dili, 07 Jullu 2011.

<sup>26</sup> Konstituisaun Repúblika Demokrátika Timor-Leste, tinan 2002, pájina:42.

<sup>27</sup> Tanba seidauk iha Lei Seguransa Nasionál nian iha lian tetum ne'e-duni ami tradús ba iha lian tetum no Indonézia hodi nune'e ami husu ita boot sira nia komprensaun se karik iha erru ruma iha ninia tradusaun.

partisipa hodi mantein seguransa interna iha Timor-Leste. Hatán ba kestaun ida-ne'e, Asesór Legál Sekretaria Estadu ba Seguransa nian, Tiago A. Sarmiento hateten katak, envolvimentu instituisaun seluk nian hodi mantein seguransa interna só bele hala'o bainhira seguransa interna nian iha ona situasaun ida ne'ebé mak perigozu hanesan Estadu enfrenta hela ameasa ba instabilidade nian ne'ebé mak mosu no halo PNTL lakon kbiit atu trata ho situasaun ne'e, entaun sei prezisa apoiu husi instituisaun seluk hanesan F-FDTL.<sup>28</sup>

Maibé iha Lei Orgánika Polísia Militar nian, artigu 6 kona-bá kompeténsia, iha pontu 2 alínea iv esplika katak, fó apoiu ba Forsa Seguransa hodi kontrola asaun interferénsia ruma tuir pedidu husi orgaun competente sira no hetan autorizasaun husi Xefi Estadu Maiór Forsa Defeza nian,<sup>29</sup>

Maibé iha realidade, Unidade Polísia Militar no PNTL la halo tuir liña serbisu nian ne'ebé mak lei atribui ona ba sira tanba deit falta iha koñesimentu hodi halo interpretasaun ba regra sira ne'ebé mak aplika bainhira halo ezekusaun ba funsaun iha terrenu.

Situasaun ida-ne'e bele haree hetan bainhira akontese konfliktu entre grupu Seguransa Cruz Joven ho membru individuál Unidade Polísia Militar nian iha Kapela Sao Joao Bosco iha Beto, Comoro. Depoizde konfliktu akontese tiha, parte Unidade Polísia Militar nian mai kedas hodi bolu membru Unidade Polísia Militar nian ne'e no mós Seguransa Cruz Joven nian tolu hodi halo interrogatóriu.

Kazu kapturasaun ne'ebé hala'o husi Unidade Polísia Militar hasoru membru F-FDTL nian ne'ebé mak oho-mate avó ferik ida iha Balide iha fulan kotuk. Detensaun ba membru F-FDTL nain 6 ne'ebé halo tiruteiu hasoru kareta patrulla Task Force, PNTL iha distritu Liquisa iha tinan kotuk.

Kazu hirak-ne'e hatudu kona-bá envolvimentu direta Unidade Polísia Militar nian ba iha Seguransa Interna. Tuir loloos situasaun hanesan ne'e sei hamosu ostilidade entre instituisaun rua ne'e, instituisaun PNTL ho instituisaun Unidade Polísia Militar iha aban-bainrua.

Enkuantu iha Lei Seguransa Nasionál nian, Artigu 18 kona-bá Sistema Seguransa Nasionál integradu, ne'e sei bele hala'o só bainhira iha situasaun emerjénsia, nune'e mós, Lei Orgánika Polísia Militar, artigu 6 kona-bá kompeténsia, iha pontu 2 alínea iv esplika katak Unidade Polísia Militar nian sei bele fó apoiu só bainhira solisita husi insituisaun seguransa nian hanesan PNTL.

Tuir loloos regra sira kona-bá seguransa nasional nian, seguransa interna, nune'e mós Lei Orgánika PNTL nian klaru tebetebes maibé sempre iha sobrepozisaun iha ezekusaun ba funsaun nian. Tuir Fundasaun Mahein nia hanoin situasaun ida-ne'e akontese tanba falta iha koñesimentu membru sira nian hodi interpreta regra sira ne'ebé mak governu estipula ona. Tan ne'e mak hamosu kontradisaun iha ezekusaun ba funsaun nian entre Polísia nasional, nune'e mós Unidade Polísia Militar nian iha terrenu.

Atu bele evita situasaun ne'e, Fundasaun Mahein rekomenda atu halo sosializasaun kona-bá lei sira ne'ebé mak aplika, fó instrusaun molok hala'o operasaun no mós hasa'e kapasidade membru sira nian hodi bele komprende kona-bá regra sira ne'ebé aplika.

---

<sup>28</sup> Entrevista ho Asesór Jurídiku Asesór Legál iha Sekretaria Estadu ba Defeza nian, Tiago A. Sarmiento, iha Dili, 24 Jullu 2011.

<sup>29</sup> Estatuta Orgánika Polísia Militar, Dekretu Lei No. 26/2009.

## Operasaun Konjunta entre PM – PNTL

Depoizde konfliktu tinan 2006 nian ne'ebé konsege hamosu problema boot hasoru instituisaun F-FDTL no PNTL. Konfliktu entre instituisaun rua ne'e hahú hakmatek bainhira Primeiru Ministru anunsia Operasaun Konjunta entre F-FDTL ho PNTL hodi buka-tuir rebelde sira ne'ebé lidera husi Majór Alfredo.

Operasaun Konjunta ne'e hala'o hodi responde ba kazu tiruteiu ne'ebé komete husi Majór Alfredo Reinaldo no Gastao Salsinha Cs. hasoru Prezidente Repúblika Jose Ramos Horta no Primeiru Ministru Xanana Gusmao. Tiruteiu ne'ebé akontese iha loron 11 Feveireu 2008 ne'e konsege hakanek PR Ramos Horta.<sup>30</sup>

Operasaun Konjunta ne'ebé mak envolve instituisaun F-FDTL no PNTL liuhosi rezolusaun governu 3/2008, loron 17 fulan Feveireu<sup>31</sup> ne'e nu'udár pájina foun ka inísiu ida ba kooperasaun entre instituisaun F-FDTL no PNTL hodi hamriik hasoru ameasa ba seguransa interna no mós seguransa esterna nian iha aban-bainrua. No operasaun konjunta ida-ne'e loke ona dalan hodi bele kria tán operasaun konjunta sira iha aban-bainrua nian hodi rezolve problema seguransa interna iha Timor-Leste.

Iha relasaun ba ne'e, Asesór ba Prevensaun Konfliktu no Jestaun Seguransa husi Sekretaria Estadu ba Seguransa nian, Anacleto da Costa Riberio, hateten katak, importante tebes atu kria kooperasaun entre instituisaun defeza no instituisaun seguransa nian atu sai efetivu no eficiente liu hodi kontrola situasaun tanba Timor-Leste nu'udár nasaun ki'ik ida no iha forsa seguransa (PNTL) no defeza (F-FDTL) nian ne'ebé iha número ki'ik, ne'e-duni importante tebes atu halo polítika integrasaun entre instituisaun sira-ne'e hodi hasoru ameasa interna nune'e mós esterna.<sup>32</sup>

Enkuantu iha Lei Seguransa Nasionál nian Artigu 18 kona-bá Sistema Seguransa Nasionál integradu ne'ebé defini iha artigu 1 katak, Intervensaun ba ameasa no risku sira hasoru Seguransa Nasionál nian presiza integridade husi komponente no unidade hirak tuirmai ne'e, laiha prejuizu ba sira nia autonomia hodi hala'o sira ida-idak nia misaun:

- a) FALINTIL-FDTL,
- b) PNTL;
- c) Servisu Nasionál Interlijénsia nian;
- d) Autoridade Protesaun Sivíl, ne'ebé inklui Bombeiru;
- e) Sistema Autoridade Marítima;
- f) Autoridade Aviasaun Sivíl;
- g) Ofisiál Prizaun nain (prizaun);
- h) Ajénsia Imigrasaun/Servisu Migrasaun;
- i) Ajénsia Seguransa Sivíl;
- j) Alfândega;
- k) Konsellu Seguransa Distritál;
- l) Ajénsia Kuarentena.<sup>33</sup>

Maibé realidade ne'ebé mak hasoru iha terrenu hatudu katak Unidade Polísia Militar nian mós sempre tun hodi halo kapturasaun ka iha termu militar nian bolu naran “konvokasaun/vokasaun” ba membru individuál ne'ebé mak envolve iha asaun kontra lei ka

<sup>30</sup> Kilat Ilegal ho Grupu Ilegal iha Timor Leste, Mahein Nia Lian No. 6, 7 Junhu 2010.

<sup>31</sup> Repúblika Demokrátika Timor Leste, Lei do Parlamentu 2/2010 Lei Seguransa Nasionál.

<sup>32</sup> Entrevista ho Asesór Sekretaria Estadu Seguransa nian ba asuntu Prevensaun Konfliktu no Jestaun Seguransa, Anacleto Da Costa Riberio iha gabinete Sekretáriu Estadu Seguransa nian, Dili, 16 Juñu 2011.

<sup>33</sup> Tanba seidauk iha Lei Seguransa Nasionál nian iha lian tetum ne'e-duni ami tradús ba iha lian tetum no Indonézia hodi nune'e ami husu ita boot sira nia komprensaun se karik iha erru ruma iha ninia tradusaun.



indisiplinár. Nune'e mós PNTL la hala'o ninia funsaun ho di'ak bainhira hasoru kazu violasaun ba lei nian ne'ebé komete husi membru F-FDTL nian. Ida-ne'e akontese tanba iha sobrepozisaun entre Lei Orgánika Polísia Militar no Lei Orgánika PNTL nian.

Nune'e mós Lei Seguransa Nasionál nian Artigu 18 kona-bá Sistema Seguransa Nasionál integradu ne'e sei bele hala'o só bainhira iha situasaun emerjénsia. Enkuantu Lei Orgánika Polísia Militar nian, artigu 6 kona-bá kompeténsia, iha pontu 2 alínea iv esprika katak Unidade Polísia Militar sei bele fó apoiu só bainhira solisita husi instituisaun seguransa nian hanesan PNTL.

Kona-bá asuntu ne'e, Fundasaun Mahein konsidera katak Lei Orgánika PNTL no Lei Orgániku UPM nian nune'e mós Lei Seguransa Nasionál nian kontraditóriu tebes iha kestaun kona-bá fó autoridade ba membru ida-idak hodi hala'o sira nia knaar. Ne'e-duni sempre hamosu problema iha ezekusaun ba sira nia autoridade tanba iha sobrepozisaun ba funsaun entre Polísia Militar no Polísia Nasionál Timor-Leste (PNTL).

Situasaun hanesan ne'e bele hamosu ostilidade iha tempu ruma entre instituisaun instrumentu estadu nian ne'e iha terrenu. Ne'e-duni tuir Fundasaun Mahein nia hanoin tenke iha regra ba tranzisaun nian hodi fó leet ba Unidade Polísia Militar F-FDTL nian atu foti medida sira ne'ebé proativu hodi trata ho problema seguransa interna nian. Pelumenus regra ida-ne'e bele hamosu separasaun ba funsaun entre F-FDTL no PNTL temporáriamente ho tempu ne'ebé espesífiku.

Hodi nune'e la hamosu tensaun entre soldadu F-FDTL Unidade Polísia Militar nian no polísia PNTL nian iha terrenu. Tuir Fundasaun Mahein (FM) nia hanoin,, iha períodu tranzisaun ida-ne'e, tenke iha divizaun ba serbisu ne'ebé klaru iha Timor-Leste entre Unidade Polísia Militar F-FDTL no PNTL hodi nune'e lamosu sobrepozisaun bainhira hala'o knaar.

Governu labele fahe deit entre metan no mutin kona-bá âmbito serbisu husi instituisaun rua ne'e. Área sira ne'ebé mak Unidade Polísia Militar F-FDTL nian ka PNTL halo mós tenke defini didi'ak. Hodi nuen'e lamosu malinterpretasaun husi sira ne'ebé iha kraik.

Atu bele hetan konsensu iha distribuisaun ba funsaun nian entre Unidade Polísia Militar F-FDTL no PNTL,, hahú agora kedas parte rua ne'e tenke halo diskusaun hodi rezolve problema kona-bá distribuisaun funsaun nian ida-ne'e. Hodi nune'e, F-FDTL no mós PNTL sei iha quadru jurídiku ida ne'ebé klaru.

### **Lokál no sistema Fiskalizaun Polísia Militar nian**

Unidade Polísia Militar atual ne'e nia kuartél iha dalan Kintal Bo`ot, Dili, kapitál Nasaun Timor-Leste nian. Kuartél ne'e harii besik ba área Kintal Bo`ot nian, ne'ebé uluk, durante okupasaun Indonéziu nian, nu'udár edifísiu Administrasaun Distritál Dili nian ne'e transforma tiha sai Kuartél Jerál Unidade Polísia Militar (UPM) F-FDTL.

Kuartél Polísia Militar nian ne'ebé iha sentru Sidade Dili nian, sai nu'udár obstákulu hodi difíkulta prosesu fiskalizaun Polísia Militar nian hasoru soldadu F-FDTL sira ne'ebé mak iha Kuartél laran nune'e mós sira hirak ne'ebé mak hala'o hela knaar iha terrenu.

Tanba se bainhira ita haree bazeia ba Lei Orgánika Polísia Militar, artigu 6 kona-bá kompeténsia nian, iha pontu 1 esprika katak, Polísia Militar iha responsabilidade atu mantein orden no disiplina interna iha F-FDTL nia laran, mantein regra no regulamentu hotu-hotu iha área jurisdisaun ne'ebé mak tama iha Komandu Territoriál ne'ebé nia horik ba ka ida ne'ebé mak atribui ona, no mós asegura katak parte militar nian sei la halo asaun ne'ebé indisiplinár ka asaun ne'ebé la prestijozu hasoru instituisaun militar nian.

No iha pontu 2 alínea a husi artigu ne'e mós haktuir katak, Unidade Polísia Militar nian iha kompromisu atu evita hahalok ne'ebé kontra lei no asaun disiplinár, no mós tau-matan ba facilidade patrullamentu militar nian iha fatin sira ne'ebé mak militar hala'o ninia misaun.<sup>34</sup>

Ne'e-duni kuartél Unidade Polísia Militar nian tuir loloos iha besik ba área ka fatin sira ne'ebé mak militar hala'o ninia misaun, hodi halo fiskalizaun no evita asaun krime nune'e mós asaun indisiplinár husi membru F-FDTL sira bainhira hala'o knaar iha terrenu.

Kona-bá asuntu ne'e Fonte Fundasaun Mahein (FM) hateten katak, ideia atu harii kuartél Polísia Militar nian iha sidade laran ne'e hanesan buat ida ne'ebé ladún di'ak. Liután, fonte Fundasaun Mahein nian ne'e mós esplika katak, kuartél Polísia Militar nian tuir loloos iha liur ba sidade no besik ba fatin treinamentu militar nian hodi bele fasilita fiskalizaun ba soldadu F-FDTL sira.<sup>35</sup>

Maibé tuir observasaun Fundasaun Mahein (FM) nian katak, durante ne'e Unidade Polísia Militar nian halo deit patrullamentu iha sidade laran. Patrullamentu iha sidade laran ne'e sai ona nu'udár rotinidade Unidade Polísia Militar nian hodi mantein no supervizona hahalok husi membru sira ne'ebé mak tama mai iha sidade laran hodi labele envolve an iha asaun sira ne'ebé mak kontra lei nune'e mós disciplina militar nian.

Tuir Fundasaun Mahein nia hanoin, di'akliu kuartél Unidade Polísia Militar nian ne'e harii iha liur ba sidade besik ba kuartél militar nian ne'e-duni bele fasilita sistema fiskalizaun Polísia Militar nian ba iha soldadu F-FDTL sira. Se bainhira kuartél Polísia Militar nian tau besik ba kuartél F-FDTL nian sei sai fásil atu halo fiskalizaun, se karik fiskalizaun ladún iha, ne'e sei bele hamosu violasaun disiplinár husi membru individuál sira.

Kazu sira violasaun disiplinár husi membru balun ne'ebé mak sempre akontese iha tempu hirak foin lalais ne'e, loos duni katak sei iha relasaun ho sistema fiskalizaun ne'ebé mak seidak estritu, ne'ebé hala'o husi Unidade Polísia Militar nian durante ne'e. Akontesimentu iha Laivai ne'e nu'udár asaun indisiplinár ne'ebé envolve membru F-FDTL balun husi Batalaun primeiru ne'ebé nia kuartél iha Baucau.

Akontesimentu Laivai ne'ebé mak halo mate joven nain ida no hakanek nain tolu seluk to'o lori ba iha Ospital nu'udár rezultadu husi baku-malu entre joven sira ho membru membru F-FDTL nian balu.<sup>36</sup>

Akontesimentu seluk, hanesan akontesimentu tiru ne'ebé mak komete husi membru F-FDTL nian balun hasoru kareta patrulla polísia Task Force nian ne'ebé akontese iha área Liquisa iha loron domingu 05 Setembru 2010. Akontesimentu ne'e envolve membru F-FDTL nain 6 ne'ebé ho kilat kompletu sa'e kareta Hilux ho número xapa-matríkula F-FDTL-58 konsege halo membru comunidade sira sai pániku.<sup>37</sup>

Violénsia hanesan hahalok indisiplinár, ida-ne'e sei la akontese se bainhira Polísia Militar halo fiskalizaun ne'ebé estritu ba membru individuál sira ne'ebé mak abandona sira nia kuartél. Fiskalizaun ne'ebé dezkuidadu, sistema operasaun ne'ebé mak ladún hala'o ho di'ak nune'e mós fatin ba kuartél Unidade Polísia Militar nian ne'ebé dook husi atividade militar nian, fó oportunidade hodi akontese asaun indisiplinár ne'ebé komete husi membru balun hasoru comunidade nune'e mós hasoru instituisaun seluk.

<sup>34</sup> Estatuta Orgánika Polísia Militar, Dekretu Lei No. 26/2009.

<sup>35</sup> Entrevista ho fonte A Fundasaun Mahein iha Dili, 30 Juñu 2011

<sup>36</sup> Kazu Laivai, Família Sei Fó Presaun Ba Komando F-FDTL, Jornál Timor Post, Edisaun 02 Setembru 2010.

<sup>37</sup> Oknum F-FDTL Tiru Kareta PNTL, Jornál Suara Timor Lorosae, Edis, 06 Setembru 2010.

Tan ne'e mak Fundasaun Mahein rekomenda ba Unidade Polísia Militar nian atu hametin fiskalizaun ba membru sira no hasa'e sistema operasaun iha fatin sira ne'ebé mak F-FDTL hala'o nia knaar hodi nune'e bele hamenus asaun violénsia no mós asaun indisiplinár hasoru komunidadade iha aban-bainrua.

### **Lideransa Unidade Polísia Militar nian**

Dezde estabelesimentu Unidade Polísia Militar nian to'o agora, akontese ona mudansa ba lideransa nian iha instituisaun UPM ne'e nia laran. Iha inísiu husi ninia estabelesimentu, Unidade Polísia Militar nian ne'e lidera kedas husi ofisiál joven ida naran Alfredo Reinaldo Alves ho diviza Majór, molok dada nia mai hodi lidera Unidade Polísia Militar nian, Alfredo konsege sai nu'udár komandante Unidade Navál F-FDTL nian husi tinan 2003 to'o 2006.

Alfredo demitidu no troka ho Kapitaun Abel da Costa Xavier tanba ninia envolvimentu iha krize tinan 2006 nian ne'ebé mak ikusmai lori nia ba mate iha atake armadu ida ba rezidénsia Prezidente Repúblika Timor Leste, Jose Ramos Horta nian iha tinan 2008 liubá.

Kapitaun Abel da Costa Xavier sai nu'udár komandante Unidade Polísia Militar hodi troka Majór Alfredo husi tinan 2006 to'o tinan 2011. Kapitaun Abel mai husi organizaun Sagrada Familia ne'ebé mak halo mós funu iha ai-laran tanba líder organizaun sagrada familia nian ne'e mós nu'udár ema veteranu kombatente ida ho naran Cornelio Gama, naran kódigu L-7.

Kapitaun Abel da Costa troka husi Majór Renilde Guterres Corte-Real de Silva iha loran 14 Fevereiro 2011. Fundasaun Mahein nota katak dezde estabelesimentu Unidade Polísia Militar nian to'o agora halo ona mudansa ba lideransa nian dala tolu iha Unidade Polísia Militar nia laran no ida-ne'e sertamente sei lori mudansa pozitivu ba instituisaun ne'e iha aban-bainrua.

### **Konkluzau**

Iha jerál, instituisaun ne'ebé mak iha responsabilidade direta ba seguransa nasional nian mak PNTL, ne'ebé nu'udár mala'ok iha terrenu iha aplikasaun ba lei no seguransa rai-laran nian, ne'e-duni se bainhira iha envolvimentu husi instituisaun seluk hanesan Unidade Polísia Militar nian, presiza regra ida ne'ebé estritu, ne'e nesesáriu hodi nune'e la hamosu inserteza iha ezekusaun ba ninia funsaun sira.

Ida-ne'e mós sei aplika se bainhira iha estadu orden sivil nian mak instituisaun polísia nian laiha kapasidade atu implementa devér sira seguransa rai-laran nian no husu apoiu husi Unidade Polísia Militar F-FDTL nian, entaun ida-ne'e sei fásil atu halo nune'e mós tenki iha regra ne'ebé estritu kona-bá devér funsaun Unidade Polísia Militar F-FDTL nian atu fó apoiu ba PNTL hodi mantein seguransa. Auzénsia husi regra ne'ebé estritu sei difikulta envolvimentu UPM F-FDTL nian hodi trata ho krime, violénsia, nune'e mós konfliktu entre grupu boot ne'ebé mak sempre akontese ho envolvimentu husi ema sivil no mós membru militar nian balun.

Ne'e-duni, estabelesimentu ba estrutura governu iha Estadu Repúblika Demokrátika Timor-Leste nian ne'e tuir loloos katak, instituisaun ka repartisaun ida-idak hala'o ona polítika tuir sira nia kompeténsia, knaar no responsabilidade iha ninia área rasik, maibé konxiente katak iha ninia implementasaun rasik, barak mak sei iha natureza sektorál, iha interpretasaun, perspetiva. Ne'e-duni envolvimentu iha ninia tratamentu dalabarak la efektivu no efikás.

## **Fundasaun Mahein (FM) nia Rekomendasaun**

1. Rekomenda ba PNTL atu halo intervensaun lailais liu ka rezolve problema sira ne'ebé mak akontese iha comunidade nia laran, hasa'e neutralidade membru PNTL nian bainhira hala'o knaar no evita envolvimentu husi membru balun nian iha konfliktu entre grupu sira.
2. Rekomenda ba Unidade Polísia Militar (UPM) atu labele envolve an direktamente hodi halo kapturasaun ka detensaun ba membru comunidade ka membru balun ne'ebé komete krime sivil.
3. Rekomenda ba Instituisaun UPM F-FDTL no PNTL atu halo sosializasaun kona-bá lei sira ne'ebé mak iha, fó instrusaun molok hala'o operasaun nune'e mós hasa'e membru sira nia kapasidade hodi bele komprende regra sira ne'ebé mak aplika.
4. Rekomenda ba Komisaun B Parlamentu Nasionál atu halo monitorizasaun no advokasia, garante nafatin katak instituisaun rua, Polísia Militar no PNTL, hala'o sira nia knaar tuir lei sira ne'ebé aplikável.
5. Rekomenda ba Unidade Polísia Militar atu hametin fiskalizasaun ba membru sira no hasa'e sistema operasaun iha fatin sira ne'ebé mak F-FDTL hala'o sira nia knaar hodi nue'e bele hamenus hahalok violénsia hasoru comunidade iha aban-bainrua.
6. Rekomenda ba Unidade Polísia Militar no PNTL atu hala'o sira nia knaar tuir regra sira ne'ebé mak aplika.
7. Rekomenda ba F-FDTL atu hakru'uk no hamta'uk ba lei ne'ebé mak implementa husi Unidade Investigasaun Krime PNTL.
8. Rekomenda ba governu no komisaun B Parlamentu Nasionál atu hakerek Lei no Dekretu Lei sira iha lian Tetum atu nune'e bele fasilita membru PNTL no F-FDTL sira hodi bele komprende.

## Bibliografia

### Lei sira

Estatuta Orgániku Polísia Militar, Dekretu Lei No. 26/2009.

Observasaun ba transformasaun Falintil ba F-FDTL no ninia Implikasaun, Buletin La`o Hamutuk, Vol. 6, 1-2 Abril 2005.

Estatuta Orgánika Polísia nasional, (PNTL) Dekretu Lei Número 9 / 2009.

Konstituisaun Repúblika Demokrátika Timor-Leste, tinan 2002.

Repúblika Demokrátika Timor Leste, Lei Parlamentu nian 2/2010 Lei Seguransa Nasionál.

### Jornál

Membro F-FDTL Tiru Kareta PNTL, Jornál *Suara Timor Lorosae*, Edis, 06 Setembru 2010.

Kazu Laivai, Família Sei Fó Presaun Ba Komando F-FDTL, Jornál *Timor Post*, Edisaun 02 Setembru 2010.

### Wawancara

Entrevista ho fonte A Fundasaun Mahein iha Dili, 30 Juñu 2011.

Entrevista ho Komandante Unidade Polísia Militar, Majór Renilde Guterres Corte-Real e Silva iha kuartél Polísia Militar Kintal Bo`ot, Dili 29 Juñu 2011.

Entrevista ho Asesor Jurídiku Asesor Legál iha Sekretaria Estadu ba Defeza nian, Tiago A. Sarmiento, iha Dili, 24 Jullu 2011.

Entrevista ho sefi Aldeia Auhu Soltorio Junior Ximenes Nunis, Dili, 08 Juñu 2011.

Entrevista ho Gordon Peake Observador Asuntu defeza no polisiamentu Timor Leste, liuhosi telefone Skype iha Internet iha Dili, 07 Jullu 2011.

Entrevista ho Asesor Sekretaria Estadu ba Seguransa ba asuntu Prevensaun Konflitu no Jestaun Seguransa, Anacleto Da Costa Riberio iha gabinete Sekretaria Estadu ba Seguransa, Dili, 16 Juñu 2011.

### Internet

[http://old.cjitl.org/index.php?option=com\\_content&task=view&id=577&Itemid=99999999](http://old.cjitl.org/index.php?option=com_content&task=view&id=577&Itemid=99999999)

[www.cjitl.org/.../174-instituisaun-be-kruel-instituisau...](http://www.cjitl.org/.../174-instituisaun-be-kruel-instituisau...) - Timor Leste.

<http://mauberedigitalarmy.wordpress.com/2006/07/18/your-viewpoint-on-my-viewpoint/>

### Sira seluk

Kilat Ilegal ho Grupu Ilegal iha Timor Leste, Mahein Nia Lian No. 6, 7 Juñu 2010.

Pedidu no Lamentasaun husi Ekipa Advokasia Violénsia Bazeia ba Jéneru, Dili, 06 Jullu 2011.